



廣惠肇碧山亭沿革史

出版委員會輯

溯廣惠肇碧山亭，歷史悠久，垂八十餘稔。無奈年代湮遠，其間經過戰爭影響，文獻卷帙散失，歷史沿革，遂無可考。然而，同人等出版『廣惠肇碧山亭萬緣勝會特刊』，鑑於先賢手創以及歷屆董事諸君繼任開來之功績不可泯滅，乃多方搜集資料，或憑前輩之口述，加以考訂，率爾成篇，其間畧漏訛誤，在所難免，尚望我三屬同仁，有以指正，則幸甚矣。

遠在同治初年，開僑梅南瑞先生（根據光緒十六年庚寅碑文，有『創買碧山亭地梅南瑞』字樣。），鑑於三屬同僑南來營生者日衆，而捆載歸國者固多，埋骨異域者亦不少。乃慨然倡議，於同治五年辛未購置墳地，完成義舉；今碧山亭湯申律大路旁，尚有界碑可稽。顧當時對於墳場管理，組織未盡完善，迨至光緒十六年庚寅，乃由當年大總理梅湛軒先生督辦建廟及開馬車路，勒碑紀盛，始具規模。

民國初年，總理吳勝鵬先生任內，曾修築道路，司理陳錦偉先生，發起『模範山』制度，劃分墳塚，編列號數，依照先後，不許自由選擇，庶免秩序零亂，管理維艱。土工輩則聲言無論土壤高亢乾涸抑或低窪潮濕，一概依序安葬棺木；因此惹起若干同僑不滿。適當時普長春戲院伶人扎脚文，姜魂俠等先後逝世，亦以上述情形引起爭執，普長春伶工等乃召集三屬各行業團體代表集議，印發反對碧山亭模範山制度傳單，並擬進行改組，由各行團派出代表共管碧山亭墳場事務。

總理吳勝鵬先生亦召集南順，番禺，東安，中山，寧陽，岡

州，三水，惠州，肇慶九大會館代表，集議於養正學校（當時地址在南天酒樓後）。席間，吳勝鵬先生展示碧山亭地圖，契據（牙蘭），證明碧山亭墳地係由九大會館置業，應由九大會館共同管理為原則。於是即席議決每間會館派出代表二人，共同組織碧山亭公所董事會。是為碧山亭由廣惠肇三屬會館管理之始。

翌年輪值中山會館唐啟光先生任總理，任期兩年。唐啟光先生仍維持模範山原議，通過不許預定壽墓。同時購置新山七座，合前十一座，共為十八座。於是面積展拓，規模大備。然鑑於墳地廣濶，有被霸佔之虞，是以管理工作，不容疏忽，遂定總理，財政，司理每星期巡視山地界址一次，於星期早晨早集中於華民政務司署前聯同出發。

次任總理為鄭秀謙先生，對於碧山亭之建設工作，亦殊積極，先後重修青雲路，禮亭，茶亭。又因每星期巡山人數寥寥無幾，奔馳於荒山中，頗嫌寂寞，遂倡議全體董事，每星期日一律參加巡山車輛，則在當年司理所屬之會館出發，全體董事依時集合。會議地點，亦在當年司理之會館舉行。至此，參加巡山者漸衆。至一九一四年，為利便參加巡山之董事聯絡起見，乃於公所內裝設電話。

厥後，則歷屆總理董事，迭有建樹。今則墳場內道路交通，秩序井然。碧山亭新公所，於一九五三年改建落成；碧山亭學校新校舍亦於一九五七年開幕，不愧為模範墳場也。